

舊

唐

書

五

唐書本紀卷第十七上

劉 昫 等脩

聞人詮校刊沈桐同校

敬宗

文宗上

敬宗睿武昭愍孝皇帝諱湛穆宗長子母曰恭僖太后王氏元和四年六月七日生於東內之別殿長慶元年三月封景王二年十二月立爲皇太子四年正月壬申穆宗崩癸酉皇太子即位柩前時年十六甲子左僕射韓臯卒丙子群臣準遺詔奏皇帝寶冊禮畢詔賞神策諸軍士人絹十匹錢十千畿內諸軍鎮絹十匹錢五千其餘軍鎮頒給有差內出綾絹三百萬段以助賞給穆宗初即位在京軍士人獲五十千在外軍鎮差降無幾至是宰臣奏議請量國力頒賞故差減於先朝物議是之羣臣五上章請聽政從之二月辛巳朔上縷服見羣臣於紫宸門外壬午渤海送備宿衛大聰獻等五十人入朝癸未貶戶部侍郎李紳爲端州司馬丙戌貶翰林學士駕部郎中知制

唐紀十七上
誥龐嚴爲信州刺史翰林學士司封員外郎知制誥 防爲汀州刺
史皆紳之引用者以右拾遺吳思爲殿中侍御史充入蕃告哀使李
紳之貶李逢吉受賀群官至中書而思獨不往逢吉怒而斥爲遠使
戊子河北告哀使諫議大夫高允恭卒於東都辛卯勅沒掖庭宮人
先配內園宮人並宜放出任其所適己亥冊大行皇帝皇太后爲太
皇太后庚子西川節度使杜元穎進罽毼打毬衣五百事非禮也辛
丑上始御紫宸殿受朝旣退幸飛龍院厚賜內官等物有差以米貴
出太倉粟四十萬碩於兩市賤糶以惠貧民癸未夜太白犯東井北
轅乙巳上率羣臣詣光順門冊皇太后丁未御中和殿擊毬賜教坊
樂官綾絹三千五百匹戊申擊毬於飛龍院己酉大合樂於中和殿
極歡而罷內官頒賜有差三月庚戌朔貶司農少卿李彤吉州司馬
以前爲鄧州刺史坐贓百萬仍自刻德政碑故也壬子上御丹鳳樓
大赦天下京畿夏青苗錢並放秋青苗錢每貫放二百文天下常貢
之外不得進獻六宅十宅諸王女宜令每年於選人中選擇降嫁今

後戶帳田畝五年一定稅曰疋日風且雨甲寅始於延英對宰臣丙辰
以尚書右丞韋顥為戶部侍郎戊午禮儀使奏外命婦正旦及四始
日舊行起居之禮伏以禮順則瀆請停從之庚申工部尚書胡証檢
校戶部尚書京兆尹甲子故山南東道節度使牛元翼家為王廷湊
所害上惜其冤橫傷悼久之仍歎宰執非才縱姦臣跋扈翰林學士
韋處厚奏曰理亂之本非有他術順人則理違人則亂陛下當食歎
息恨無蕭曹今有一裴度尚不能用此馮唐所以感悟漢文雖有頗
牧不能用也以太子少保張弘靖為太子少師分司東都太子賓客
令狐楚為河南尹丁卯以刑部尚書段文昌判左丞事戊辰羣臣入
閣日高猶未坐有不任立而踣者諫議大夫李渤出次白宰相俄而
始坐班退左拾遺劉栖楚極諫頭叩龍墀血流上為之動容仍賜緋
魚袋編昨徐忠信闌入浴室門杖四十配流天德庚午賜內教坊錢
一萬貫以備遊幸是夜太白犯東井北轅甲戌夏州節度使李祐奏
於塞外築烏延宥州臨塞陰河陶子等五城以備蕃寇又以党項為

盜於蘆葦關北木瓜嶺築壘以扼其衝乙亥幸教坊賜伶官綾給三千五百匹夏四月庚申朔甲申以御史大夫王涯爲戶部尚書兼御史大夫充鹽鐵轉運等使壬辰兵部侍郎武儒衡卒丙申賊張詔等百餘人至右銀臺門殺閹者揮兵大呼進至清思殿登御榻而食弓箭庫右神策軍兵馬使康藝全率兵入宮討平之是日上聞其變急幸左軍丁酉上還宮羣臣稱慶諫議大夫李渤以上輕易致盜言甚激切己亥九仙門等監共三十五人並笞之辛丑染坊使田晟段政直流天德以張韶染坊役夫故也詔雪吐突承璀之罪令男士曠改葬之丙午宰臣李逢吉封涼國公牛僧孺封奇章縣子五月己酉朔乙卯制以正議大夫尚書吏部侍郎上柱國涇源縣開國男食邑三百戶賜紫金魚袋李程守本官同中書門下平章事以朝議郎守尚書戶部侍郎兼御史大夫判度支上柱國賜紫金魚袋竇易直爲朝散大夫本官同中書門下平章事判度支戶部侍郎韋顥賜金紫己未割富平縣之豐水鄉下邽縣之翟公鄉澄城縣之撫道鄉白水

懸之會賓鄉以奉景陵癸亥以鹽州刺史傅良弼為夏州節度使東
都江陵監大轉運雷後並改為知院官從其使王涯請也六月己卯
朔以左神策大將康日全為鄜坊節度使辛巳勅以霖雨命䟽決京
城三囚庚辰大風吹壞延喜景風等門工部侍郎張惟素卒壬辰以
左金吾衛大將軍李愿檢校司空兼河中尹御史大夫充河中絳隰
等州節度使丙申山南西道節度使守司空裴度加同中書門下平章
事度之拜興元也為宰相李逢吉所排不帶平章事李程韋處厚日
為度論於上前故有是命加陳許節度使李光顏守司徒癸卯太保
張弘靖卒己巳浙西水壞太湖堤水入州郭漂民廬舍丁未以吏部
尚書趙宗儒為太常卿兵部尚書鄭綱為吏部尚書秋七月戊申朔
己酉睦州青溪等六縣大雨山谷發洪水泛溢漂城郭廬舍庚辰以
前河中節度使郭釗為兵部尚書戊午太子賓客許季同卒辛酉䟽
靈州特進渠置營田六百頃乙丑鄆曹濮暴雨水溢壞城郭廬舍丁
卯勅以穀貴凡給百官俸內一半合給匹段今宜給粟每斛折錢五

十文辛未以大理卿崔元略為京兆尹兼御史大夫甲戌左金吾衛
大將軍李祐進馬二百五十五匹御史溫造於閣內奏彈祐罷使違勅
進奉祐趨出待罪詔宥之襄均復等州漢江溢漂民廬舍丙子浙西
觀察使李德裕奏詔令當道造盞子二十具計用銀一萬三千兩金
一百三十兩昨已進段具用銀一千三百兩當道在庫貯備銀無二
三百兩皆百計收市方成此兩具臣當道唯有畱使錢五萬貫每事
節儉支費猶欠十三萬貫不足臣若因循不奏則負陛下任使之恩
若分外誅求又累陛下茲儉之德伏乞宣令宰臣商議何以遣臣得
上不違宣索下不闕軍須公不困疲人不斂物怨時有詔罷進奉故德
裕有是奏八月丁酉朔是夜火犯土星妖賊馬文忠與品官季文德
等凡一千四百人將圖不軌皆杖一百處死於未火犯東井甲寅詔
於閔內閔東折糴和糴粟一百五十萬石陳許蔡鄆曹濮等州水害
秋稼丁亥火入東井己丑以李愷孫宏為河南府丘曹恭奏
清孫馮為伊陽令錄忠臣後也是夜金犯軒轅右角壬辰江王府長

蔣

史段釗上言稱前任龍州刺史近郭有牛心山山上有仙人李龍遷祠頗靈應玄宗幸蜀時特立祠廟上遣高品張士謙往龍州檢行迴奏牛心山有掘斷處羣臣言宜須脩築時方互寒役民數萬計東川節度使李絳表訴之甲子以太常卿趙宗儒爲太子少師乙巳宣武軍節度韓充卒九月丙午朔丁未波斯大商李蘇沙進沉香亭子材拾遺李漢諫云沉香爲亭子不異瑤臺瓊室上怒優容之庚戌以河南尹令狐楚檢校禮部尚書汴州刺史宣武軍節度宋汴毫觀察等使乙卯罷理亂使以諫議大夫李渤知亂奏請置胥吏添課料故也戊午加朱克融檢校司空詔浙西織造可幅盤條擦綾一千匹觀察使李德裕上表論諫不奉詔乃罷之己巳以兵部侍郎王起爲河南尹甲子吐蕃遣使求五臺山圖己巳浙西淮南各進宣索銀粧奩三具冬十月丙子朔宗正寺選尚縣主壻和元亮等二十五人各賜錢三十万令備吉礼辛巳以吏部侍郎崔從爲太常卿庚子嶺南節度使鄭權卒辛丑吐蕃貢犛牛鑄成銀犀牛羊鹿各一千寅以鄂岳觀

察使檢校兵部尚書崔植檢校吏部尚書兼廣州刺史御史大夫充
嶺南節度觀察經略使以戶部侍郎韋顛為御史中丞兼戶部侍郎
以御史中丞鄭覃權知工部侍郎以刑部侍郎韋弘景為吏部侍郎
以權知禮部侍郎李宗閔權知兵部侍郎以工部侍郎于敖為刑部
侍郎十一月丙午朔戊申安南都護李元素奏黃家賊與環王固合
勢陷睦州殺刺史葛維蘇常湖嶽吉潭柳等七州水傷稼庚申葬穆
宗于光陵十二月乙亥朔癸未迴紇吐蕃奚契丹遣使朝貢襄州柳
公綽滄州李全畧晉州李寰滑州高承簡並自尚書加檢校右僕射
以前起居舍人劉栖楚為諫議大夫淮南節度使王播厚賂貴要求
領鹽鐵使諫議大夫獨孤朗張仲方起居郎孔敏行柳公權宋申錫
補闕韋仁實劉敦儒拾遺李景讓薛廷老等伏延英抗疏論之戊子
夜月掩東井庚寅加天平軍節度使烏重胤同平章事乙未徐泗王
智貞請置僧尼戒壇浙西觀察使李德裕奏狀論其姦幸時自憲宗
朝有勅禁私度戒壇智貞冒禁陳請蓋緣久不興置由是天下沙門

奔走如不及智興邀其厚利由是致富時議醜之丁酉宰相牛僧孺
進封奇章郡公李程彭原郡公賈易直晉陽郡公並食邑三千戶吏
部侍郎韓愈卒

寶曆元年春正月乙巳朔辛亥親祀昊天上帝于南郊禮畢御丹鳳
樓大赦改元寶曆元年先是鄆縣令崔發坐誤辱中官下獄是日與
諸囚陳於金鷄竿下俟釋放忽有內官五十餘人環發而毆之發破
面折齒臺吏以蓆蔽之方免有詔復繫於臺中宰相救之方釋宰相
牛僧孺累表乞解機務帝許以郊禮後乙卯以僧孺檢校禮部尚書
同平章事鄂州刺史充武昌軍節度鄂岳觀察使淮南節度使王播
兼諸道鹽鐵轉運使於鄂州特置武昌軍額寵僧孺也壬申以給事
中李渤爲桂州刺史兼御史中丞桂管防禦觀察使李德裕獻丹宸
箴六首上深嘉之命學士韋處厚優其荅詔辛卯以前禮部郎中李
翱爲廬州刺史以求知制誥面數宰相李逢吉過故也辛丑江西觀
察使薛放卒癸卯以職方郎中知制誥王璠爲御史中丞三月乙巳

朔以兵部尚書郭釗爲梓州刺史劍南東川節度使壬子宴群臣於
三殿戊辰夜有流星長三丈出紫微入濁滅辛未以前桂管觀察使
殷侑爲江西觀察使上御宣政殿試制舉人二百九十一人以中書
舍人鄭涵吏部郎中崔瑄兵部郎中李虞仲並克考制策官夏四月
甲戌朔宰相涼國公李逢吉進封鄭國公以右神策大將軍康志睦
檢校工部尚書兼青州刺史平盧軍節度使宣中書以諫議大夫劉
栖楚爲刑部侍郎丞郎宣授自栖楚始也鄭涵等考定制舉人勅下
後數日上謂宰相曰韋端符楊魯士皆涉物議宜與外官乃授端符
白水尉魯士誠固尉宰臣請其罪名不報癸巳群臣上徽號曰文武
大聖廣孝皇帝御宣政殿受冊禮畢御丹鳳樓大赦天下大辟罪已
下無輕重咸赦除之時李紳貶官李逢吉惡紳不欲紳量移乃於赦
書節文內但言左降官已經量移宜與量移近處不言未量移者宜與
量移翰林學士上䟽論列云不可爲李紳一人與逢吉相惡遂令近
年流貶官皆不得量移則乖曠蕩之道也帝遽命追赦書添改之乙

亥以劔南東川節度檢校司空李絳爲左僕射御史蕭徹彈京兆尹兼御史大夫崔元略違詔徵畿內所放錢萬七十貫付三司勘鞫不虛辛丑勅削元略兼御史大夫五月甲辰朔以前平盧軍節度使檢校左僕射兼戶部尚書賜振武軍錢一十四萬貫脩築東受降城庚戌幸魚藻宮觀競渡庚申正衙命使冊九姓迴紇登里囉汨沒密施毗伽昭禮可汗丙寅太子少傅致仕閻濟美卒丁卯湖南觀察使沈傳師奏當道先配吐蕃羅沒等一十七人準赦放還本國今各得狀不愿還從之庚午以右金吾將軍李文悅爲豐州刺史天德軍防禦使安南李元喜奏移都護府於江北岸六月壬申朔乙酉詔公主郡主並不得進女口丙戌將作監張武均出爲洋州刺史坐贓犯也諸司白身馮志謀等三百九人並賜綠丁亥命品官田務豐領國信十二車賜迴紇可汗及太和公主巳丑河中節度使檢校司空李愿卒乙未以檢校左僕射兼戶部尚書薛平檢校司空河中尹河中節度使秋七月癸卯朔以忠武軍節度使守司徒兼侍中李光顏爲太原

尹北京畱守以河東節度使王沛為許州刺史忠武軍節度使熒惑
犯右執法甲辰鹽鐵使王播進羨餘絹一百萬匹仍請日進二萬計
五十日方畢播自掌鹽鐵以正入錢進奉以希寵固位託稱羨餘物
議欲鳴鼓而攻之乙酉鄜坊水壞廬舍癸丑以右金吾衛大將軍張
茂宗為充海沂密節度使乙卯正衙命使冊司徒李光顏丙辰淄王
傅分司元錫卒己未詔王播造競渡船二十隻供進仍以船材京內
造時計其功當半年轉運之費諫議大夫張仲方切諫乃改進十隻
辛酉萬年縣典賈鎮誣告故統軍王佖男王謨等七人謀亂詔杖殺
之甲子夜月犯畢乙丑侍講學士崔郾高重進纂要十卷賜錦綵二
百匹丁卯以戶部侍郎韋顛為吏部侍郎京兆尹崔元略為戶部侍
郎奉天縣水壞廬舍辛未以左散騎常侍胡証為戶部尚書判度支
太子賓客分司盧士攻卒閏七月壬午朔以權知工部侍郎鄭覃為
京兆尹甲申拾遺李漢舒元褒薛廷老於閣內論曰伏見近日除授
往往不由中書進擬多是內中宣出臣恐紀綱寤壞姦邪恣行伏希

詳察上然之詔度支進銅三千觔金薄十萬翻修清思院新殿及昇
陽殿圖障丙戌戶部尚書致仕裴堪卒戊子以給事中盧元輔爲工
部侍郎壬辰以前河東節度使李聽爲義成軍節度使戊戌以刑部
尚書段文昌爲兵部尚書依前判左丞事八月辛丑朔戊申以鄴國公
楊造男元湊襲鄴國公食邑二千戶兩京河西大稔勅度支和糴折糴
粟二百萬石乙卯夜太白近房戊午遣中使往湖南江南等道及天
台山採藥時有道士劉從政者說以長生久視之道請於天下求訪
異人冀獲靈藥仍以從政爲光祿少卿號昇玄先生秋九月辛未朔
丁丑衛尉卿劉遵古役人安再榮告前袁王府長史武昭謀害宰相李
逢吉詔三司鞠之壬午昭義節度使劉悟卒癸未夜太白犯南斗丙
戌夜月犯右執法丁酉華州暴水傷稼徐州王智興奏大將武華等
四百人謀亂並伏誅十月庚子朔河南尹王起奏盜銷錢爲佛像者
請以盜鑄錢論丁巳振武節度使張惟清以東受降城濱河歲久雉堞
摧壞乃移置於綏遠峰南及是功成己未以崖州安置人嗣郢王佐

爲穎王府長史分司東都仍賜金紫壬戌夜太白近哭星甲子三司
鞠武昭獄得實武昭及弟彙役人張少騰宜付京兆府決河陽節度
掌書記李仲言配流象州彙流崖州大學博士李涉流康州皆坐武
昭事也十一月庚午朔辛未以御史中丞王璠爲工部侍郎以諫議
大夫獨孤朗爲御史中丞癸酉鎮星近東井癸未以殿中少監嚴公
素爲容管經略使是夜月犯東井庚寅車駕幸溫湯即日還宮壬辰
以刑部侍郎劉栖楚爲京兆尹丙申詔封皇子普爲晉王丁酉吏部
侍郎韋顓卒十二月己亥朔辛丑以晉王普爲昭義軍節度副大使
以劉悟子將作監主簿從諫起復雲麾將軍守金吾衛大將軍同正
檢校左散騎常侍兼御史大夫充昭義節度畱後戊申夜月犯畢其
夜北方有霧起須臾遍天霧上有赤氣久而方散甲子以左僕射李
絳爲太子少師分司東都戊辰勅農功所切實在耕牛疲疇多乏須
議給賜委度支往河東振武靈夏等州市耕牛一萬頭分給畿內貧
下百姓是歲淮南浙西宣襄鄂潭湖南等州言旱傷稼

二年春正月己巳朔辛未貶殿中侍御史王源植爲昭州司馬時源植街行爲教坊樂伎所侮導從呵之遂成紛競京兆尹劉栖楚決責樂伎御史中丞獨孤朗論之太切上怒遂貶源植庚午湖南觀察使沈傳師奏奉詔校尋葉靖能羅光遠文案檢尋不獲癸酉右贊善大夫李光琨與品官李重實爭忿以笏擊重實流血上以宗屬尉兩月俸料甲戌以諸軍丁夫二萬入內穿池脩殿辛巳興元節度使裴度奏脩斜谷路及館驛皆畢功壬辰裴度來朝甲午以衛尉卿劉遵古爲湖南觀察使以國子祭酒衛中行爲福建觀察使丙申鹽鐵使王播奏揚州城內舊漕河水淺舟船溢滯輸不及期程今從閶門外古七里港開河向東屈曲取禪智寺橋東通舊官河計長一十九里其功役所費當使自方圓支遣從之二月己亥朔辛丑容管經略使嚴公素奏當州普寧等七縣請同廣昭桂賀四州例北選從之丙午夜月犯畢丁未以山南西道節度觀察處置等使光祿大夫守司空同中書門下平章事興元尹上柱國晉國公裴度守司空同平章事復知政事丁巳寒

食節三殿宴群臣自戊午至庚申方止丙寅正冊司空裴度丁卯以禮部尚書王涯檢校左僕射為山南西道節度使三月戊辰朔命興唐觀道士孫準入翰林待詔辛未江西觀察使殷侑請於洪州寶曆寺置僧尼戒壇勅殷侑故違制令壇置戒壇罰一季俸料甲戌賜宰臣百寮上巳宴于曲江亭乙亥右散騎常侍李翱卒戊寅幸魚藻宮觀競渡辛巳以同州刺史蕭俛為太子少保分司壬午以工部尚書裴武為同州刺史癸未嶺南節度使崔植奏廣湖封雷潘辯等七州戍軍除折衝別將外並請停從之丙戌昆明夷遣使朝貢丁亥勅冊才人郭氏為貴妃丙申以吏部侍郎韋弘景為陝虢觀察使四月戊戌朔橫海軍節度使李全略卒壬寅以右金吾衛大將軍高承簡為邠寧慶節度使丙午王廷湊檢校司空戌申昭義節度使留後劉從諫檢校工部尚書充昭義節度副大使知節度事庚戌鄂嶽觀察使牛僧孺奏當道沔州與鄂州隔江相對纔一里餘其州請併省其漢陽文川兩縣隸鄂州從之丙辰右金吾衛大將軍高霞寓卒丙寅先是